

TEZAUUR LITURGIC
28 OCTOMBRIE

ACATISTUL
SF. CUVIOS
IOV
DE LA
POCEAEV
II



MOSCOVA, 2000



Акафист Преподобному и Богоносному отцу нашему Иову, Почаевскому чудотворцу

Кондак 1

Избранный чудотворче и земли нашея добрый учителю, всея же вселенная усердный молитвенниче, преподобне отче Иове, чистым твоим житием просвещаемая обитель твоя и вси православнии людие благодарственная о тебе Святей Троице возносят хваления. Ты же яко имеяй дерзновение ко Господу, предстатель буди о душах наших неусыпный и на страсти воинствующим скорый помощник, да в радости сердца зовем ти:

Радуйся, Иове, преславный угодниче Божий, и обители Почаевския украшение.

Икос 1

Ангел благовестник воистинну явился еси нашим людем от врагов Церкви буруемаым отче наш Иове, елико писанми твоими и книг священных печатанием, толико и богоугодным житием и славным еже к Богу отшествием, ныне же и всей вселенной предстатель теплый являешися у Престола Владычня; сего ради

зовем ти:

Радуйся, истинная Церкви добрый воине;
радуйся, православия светлый светильниче.

Радуйся, отцы наша от ереси оградивый;
радуйся, чада их во благочестии утвердивый.

Радуйся, спасения ради дом родителей издетска оставивый;

радуйся, о души твоей попечение паче всех показавый.

Радуйся, яко твоим отроческим подвигом старцы удивишася;

радуйся, яко от юности во Ангельском образе к тем сопричтен был еси.

Радуйся, обитель Угорницкую твоим житием просветивый;

радуйся, множайшими труды монастырь Дубенский прославивый.

Радуйся, немощных в вере утверждение;
радуйся, неведущих вразумление.

Радуйся, Иове, преславный угодниче Божий, и обители Почаевския украшение.

Кондак 2

Видяще иноцы Угорництии ревностное твое в духовном житии преспеяние, схимонаха и пресвитера тебе быти устроиша, обаче Волинская земля на вящшия труды тя подвизаючи, устрои тебе игумена быти во граде Дубенстем ко отражению еретических

поползновений, православным же людям ко
окормлению духовному и к неленостному
Господеви воспеванию: Аллилуиа.

Икос 2

Разум совершен воистинну отче показал еси,
егда душевнаго ради устройства на гору
Почаевскую уклонился еси и вместо
начальствования послушанию паки предался
еси, обаче в лучший того подвиг Господь тебе
вменяше вторицею приятое zde игуменство,
братие же Почаевстии взываху ти с веселием:
Радуйся, наш отче новый и предивный;
радуйся, благочестия образе.

Радуйся, начальство, яко служение, приявший;
радуйся, Богу и ближним волею поработивыйся.
Радуйся, яко в начальстве твоём Христова
смирения подобие является;
радуйся, яко того ради покой душам нашим
обретается.

Радуйся, о людех доброе моление возносивый;
радуйся, на демоны мужественно ополчивыйся.
Радуйся, Ангельскаго ликостояния
приобщивыйся;
радуйся, добрый путевождь ко спасению нам
явивыйся.

Радуйся, спасающимся ободрение;
радуйся, лентящимся обличение.

Радуйся, Иове, преславный угодниче Божий, и обители Почаевския украшение.

Кондак 3

Сила Духа Божественнаго обогати тя Иове премудре, егда татя монастырския пшеницы обличив, абие прощение тому даровал еси и утаенное паки ему возвратил еси покаяния его ради и алчущаго телесе насыщения, сие бо сотворив, окамененную умягчил еси душу и научил еси пети: Аллилуиа.

Икос 3

Имеяй присное попечение о душе твоей отче преподобне, возлюбил еси пещерное затворение, идеже дни и нощи в молитве провождая, единому Богу беседовал еси, темже и свет благодати его темную пещеру яко Фаворскую гору облиставаше и научаше всех взывати тебе: Радуйся, молитвы непрестанное кадило; радуйся, слез неистощимый кладезю. Радуйся, древним Киево-Печерским затворником уподобивыйся; радуйся, тех благодатных дарования стяжавый. Радуйся, яко молитвами твоими братия в терпении укрепляшеса; радуйся, яко въздыханьми твоими демони от твоея обители отгнашася. Радуйся, в темную пещеру небесный свет

призвавший;
радуйся, и в наша страстныя души благодать от
Господа приносящий.
Радуйся, скалы Почаевския твердейший
адаманте;
радуйся, всея страны нашея преславный
светильниче.
Радуйся, вселенския Церкви преславный столпе;
радуйся, всех молящихся прибежище.
Радуйся, Иове, преславный угодниче Божий, и
обители Почаевския украшение.

Кондак 4

Бурю еретических находжений отгнати желая,
был еси в богоспасаемом граде Киеве со
освященным Собором Православных, идеже
неврежденную веру дерзновенно исповедал еси
и к томужде вся люди увещевал еси, тем же и
священныя книги тиснением предавати во
обители Почаевстей не преставал еси, яко всем
чтущим сия истинную веру содержать и
православно пети Богу: Аллилуиа.

Икос 4

Слышаша иноцы Почаевстии непрестанную
молитву Иисусову, твоими усты глаголемую, отче
Иове, слезы же из очию твоею текущая видеша
и твоею учительною беседою назидаящися,
образом же жития твоего умиляющися,

глаголаху:

Радуйся, молитвенниче наш предобрый;

радуйся, учителю наш кроткий.

Радуйся, благодатныя слезы источаяй;

радуйся, и наша сердца умиляй.

Радуйся, яко духовную жертву непрестанно ко
Господу возносиши;

радуйся, яко райская утешения во уме твоём
присно предносиши.

Радуйся, Крестителя в воздержании
подражателю;

радуйся, многострадальнаго в долготерпении
соревнователю.

Радуйся, тою обою дарований приобщивыйся;

радуйся, Ангельскаго сослужения сподобивыйся.

Радуйся, нищих питателю;

радуйся, скорбящих утешителю.

Радуйся, Иове, преславный угодниче Божий, и
обители Почаевския украшение.

Кондак 5

Боготечней звезде уподобился еси преподобне,
обходя землю Галицкую и Волынскую, светом же
православия вся просвещая, ревнителем веры
сугубую ревность внушая, добрых сердца в
православии утверждая, ленивых же присно
воздвизая к пению Богу: Аллилуиа.

Икос 5

Видеша монаси и простии людие игумена
Почаевския обители земли копанием и древес
саждением и гноя собиранием себе смиряюща,
яко другому Дамаскину дивляхуся, и всяку
гордыню еретическую возненавидеша, в
православии же души своя утверждаху,
глаголюще:

Радуйся, добраго подвига вождю;

радуйся, истинныя веры утверждение.

Радуйся, злочестивую гордыню еретиков
обличаяй;

радуйся, православное смиренномудрие
возношаяй.

Радуйся, яко тобою красоту благочестия
познахом;

радуйся, яко тобою суету мирскую в себе
попрахом.

Радуйся, богатым мира сего доброе вразумление;

радуйся, нищим и трудником благое утешение.

Радуйся, крест лишений волею подъявый;

радуйся, той крест нам носити пособствуй.

Радуйся, Павла скинотворца последователю;

радуйся, Христа Бога рабе благий.

Радуйся, Иове, преславный угодниче Божий, и
обители Почаевския украшение.

Кондак 6

Проповедник православныя веры и благочестия чрез все житие твое быв, Иове преподобне, сие святою кончиною твоею запечатлел еси, уже за седмицу предрек, безболезненно по причащении Святых Таин, прияти сподобился еси, никакоже о мире сем жалея, но разрешитися хотя и со Христом быти, во еже непрестанно воспевати Серафимскую песнь: Аллилуиа.

Икос 6

Возсия благолепною красотою мертвенное тело твое преподобне, еже бо в житии твоём постом и трудами сокрушал еси, тожде Господь по успении твоём нетлением и благоуханием прослави, нас же пети тебе научи:

Радуйся, небес пресельниче;

радуйся, и земли молитвенниче.

Радуйся, исхождение твое от земных предуведевый;

радуйся, о том тепле возвеселивыйся.

Радуйся, яко и нас в бесстрашии ко смерти утверждаеши;

радуйся, яко упованию на милость Божию нас научаеши.

Радуйся, любителей временнаго живота обличителю;

радуйся, будущаго воскресения нетленный плотию свидетелю.

Радуйся, плоть свою в житии распинати поревновавый;
радуйся, туюжде по смерти благоуханну явивый.
Радуйся, неверующих явное обличение;
радуйся, надеющихся доброе утверждение.
Радуйся, Иове, преславный угодниче Божий, и обители Почаевския украшение.

Кондак 7

Хотя Бог о нетлении мощей преподобнаго Иова известити Церковь, трищи в сонном видении того являет митрополиту Дионисию, аки жива и волю Господню известующа, ему же веровав Дионисий прослави Вседержителя и угодника Его с песнию: Аллилуиа.

Икос 7

Новаго тя о вселенней предстателя и чудотворца уведе освященный собор, монаси же и вси людие, егда пришедшу Дионисию на гору Почаевскую и житие твое уведевшу, честное твое тело из недр земли изнесесе нетленно и благоухания исполнено, чудеса же исцелений точаще, во еже вопити всем:

Радуйся, чудотворче новый и великий;

радуйся, всех святых сопричастниче.

Радуйся, землю Волынскую погребением твоим освятивый;

радуйся, явлением мощей твоих в православии

нас утвердивый.

Радуйся, яко тобою исцеления хромии и слепии приемлют;

радуйся, яко твоего нетленного телесе демони трепещут.

Радуйся, и нас, пред гробом твоим стоящих умиления исполняяй;

радуйся, к желанию спасения нас подвизаяй.

Радуйся, аки живый, по смерти многим явивыйся;

радуйся, небесным силам духом твоим приобщивыйся.

Радуйся, чудес источниче;

радуйся, на демоны нам крепкий помощниче.

Радуйся, Иове, преславный угодниче Божий, и обители Почаевския украшение.

Кондак 8

Странное и дивное чудо показал еси преподобне, Иове, егда вскоре по прославлении твоём явился еси посреде двою Ангелу моляся в Церкви Почаевстей и плат миром исполненный девице некоей дал еси возложения ради на раны болящему игумену Досифею, той же исцеление прием абие к твоему гробу здрав припадаше, поя Богу: Аллилуиа.

Икос 8

Весь еси воистинну обители твоея покров и заступление Иове преславне, сие бо православнии людие разумеша, егда ты на небеси узреша Богородице молящаяся о спасении святых Лавры, монахов же и мирских челевек, от агарян зело осаждаемых, но от того часа в радости тебе поющих:

Радуйся, всемогущий наш заступниче;
радуйся, святая обители стено неборимая.

Радуйся, нападения агарянская отражаяй;
радуйся, стрелы на главы их возвращаяй.

Радуйся, яко умолил еси Ангельским Силам явиться к тех поражению;

радуйся, яко многие агаряне ко Христу тогда привел еси.

Радуйся, ратники на обитель воюющия в послушники Бя претворивый;

радуйся, непокоривыя беглецы сотворивый.

Радуйся, дерзости богоборныя посрамление;

радуйся, терпения христианского увенчание.

Радуйся, упования еже на тя не посрамивый;

радуйся, молитвенники твоя спасый и прославивый.

Радуйся, Иове, преславный угодниче Божий, и обители Почаевския украшение.

Кондак 9

Всякия отступства и колебания в вере народом и обителию твоею претерпенная, отпустив преподобный Иов, молитвами своими землю Волинскую ко православию возврати и в ней святыню Почаевскую твердейший оплот истинныя веры ныне являет, приходящим к ней тьмочисленным людем, святыя же мощи его усты и сердцем целующим и поющим Богу: Аллилуиа.

Икос 9

Витии славы твоея явишася православнии архиереи и весь освященный собор, егда мощи твоя, от отступник православия сокровенная, паки изнесоша во святую Церковь поклоняющимся христианом и в веселии глаголющим:

Радуйся, православныя Волыни солнце;
радуйся, истинныя Церкви звездо.

Радуйся, заре правды ноци прешедшей
возсиявшая;

радуйся, луче, тьму ереси разгнавший.

Радуйся, в нове твоих мощей явлений паки
чудеса источаяй;

радуйся, тем отступление от православия в
конец обличаяй.

Радуйся, яко моления верных исполняти не
престал еси;

радуйся, яко согрешения отец наших не помянул еси.

Радуйся, и нас врагом прощати научаяй;
радуйся, и нас в долготерпении утверждай.

Радуйся, малодушных обличение;
радуйся, кающихся прощение.

Радуйся, Иове, преславный угодниче Божий, и обители Почаевския украшение.

Кондак 10

Спасения нашего буди и ныне ходатай Иове преподобне, зане многия растленныя обычаи нечестивии людие введоша во страну нашу и теми крепость наша оскуде, но в сокрушении сердец наших к твоему заступлению припадаем, на твое же предстательство уповающе, вопием Богу: Аллилуиа.

Икос 10

Стена твердая православной веры в земле Волинстей и Галицстей чрез все житие твое был еси отче преподобне, но и по преставлении твоём явленьми и исцеленьми за истину побораеши, еще же и невидимо душам чад твоих беседаеши, да вси вопием ти:

Радуйся, спасения нашего поборниче;
радуйся, искушений злых отгнателю.

Радуйся, ко Господу дерзновение о нас стяжавый;

радуйся, от Того благодать исцелений приявый.
Радуйся, яко со Ангелы в раи днесь
водворяешься;
радуйся, яко со Апостолы и мученики тамо
ликуеши.
Радуйся, купно с ними о Церкви предстателю;
радуйся, милосердия Божия к нам ходатаю.
Радуйся, кающихся еще в житии твоём
возлюбивый;
радуйся, ныне тех молитвы, яко фимиам к
небесному Престолу возносяй.
Радуйся, и всех молящихся скорый слышателю;
радуйся, смиренных сердцем покровителю.
Радуйся, Иове, преславный угодниче Божий, и
обители Почаевския украшение.

Кондак 11

Пение наше благодарное, от любве чистыя
приносимое, прими угодниче Божий, яко же
вдовицине лепте зане духовное имение наше
нищетно пред тобою, благими же дела
подражати тебе не возможем, но сокрушенная
воздыхания о гресех наших приносяще, твоих
добродетелей славою утешаемся, поюще Богу:
Аллилуиа.

Икос 11

Свительник православныя веры и столп
благочестия был еси отче наш Иове, словом,

житием, любовью, верою, чистотою, в них же и нас твоими молитвами укрепи, всякия же ереси и развращенныя обычаи от нас далече отжени, да благодарственное сотворим ти пение:

Радуйся, Божий избранниче;
радуйся, Ангелов собеседниче.

Радуйся, и от нас духом любви твоея не отступивый;

радуйся, и нам от духа твоего дарования разделяяй.

Радуйся, яко зрящии нетленное тело твое на страсти телесная ополчаются;

радуйся, яко чтущии о святем житии твоём, душу свою очистити тщатся.

Радуйся, ревновати о своем спасении нас научаяй;

радуйся, и ближних спасению служити нас подвизаяй.

Радуйся, ревностию о православии сердца наша распаляяй;

радуйся, покаянием о гресех души наша сокрушаяй.

Радуйся, духовнаго сна разгнателью;

радуйся, духовныя бодрости подателю.

Радуйся, Иове, преславный угодниче Божий, и обители Почаевския украшение.

Кондак 12

Благодать непрестанная молитвы и о теле небрежения, радости же духовная и к ближним сострастия обильно стяжал еси отче Иове, тем же и нас ленивых и грешных, тоя причастники сотвори твоими всемогущими молитвами, да мучительства страстей избавишися, воспоим Богу: Аллилуиа.

Икос 12

Поюще твое дивное житие на земли и на небеси прославление, молим тя Иове преподобне: утверди молитвами твоими православную веру во стране тебе присной, всю же Христову Церковь на земли противу неверия и ереси защити и укрепи, наша же не отвергни хваления сицевая:

Радуйся, Апостольскаго служения сопричастниче;

радуйся, пустынночестных подвигов ревнителю.

Радуйся, нищеты духовная благий образе;

радуйся, плача духовнаго богатный стяжателю.

Радуйся, яко кротостию твоею души татий и злодеев, аки наследие доброе Господеви привел еси;

радуйся, яко со всеми алкавшими и жаждавшими правды ныне во дворех Божиих насыщаешися.

Радуйся, от Бога со всеми милостивыми

помилованный и прославленный;
радуйся, со всеми чистыми сердцем лицом к
лицу ныне Того созерцаяй.
Радуйся, и нас от небесных с любовью назираяй;
радуйся, всем о православии трудящимся
помощь от Господа подаваяй.
Радуйся, обитель твою от всякаго обстояния
сохраняяй;
радуйся, и о всей вселенней молитвы Господеви
возносяй.
Радуйся, Иове, преславный угодниче Божий, и
обители Почаевския украшение.

Кондак 13

О всеблаженне преподобне Иове, православныя
веры великий ревнителю и ереси твердый
обличителю! Малаго сего моления от убогих
сердец наших к тебе возносимаго не отвержи,
но буди нам присный в вере и покаянии
наставник, в подвизех благий помощник и пред
Господом о спасении нашем неустанный
молитвенник, о тебе вопиющих Богу: Аллилуиа.
Сей Кондак читается трижды, затем снова
читается Икос - 1, Кондак - 1,

МОЛИТВА

О преподобне отче Иове, иноков трудолюбнаго
жития богомудрый наставниче, кротости и
воздержания, чистоты и целомудрия,

братолюбия и нищелюбия, терпения и бдения от ранней юности до поздней старости неумолимый подвижниче, веры православных великий ревнителю и непреоборимый поборниче, земли Вольнския и Галицкия светило богосветлое и святые Почаевския обители непобедимый защитниче!

Призри оком благоутробия твоего на нас недостойных чад твоих, к тебе усердно по вся дни прибегающих и на боголюбивые люди сия, пред твоими духоносными и многоцелебными мощами собравшиися и благоговейно к тем припадающия, и испроси предстательством твоим ко Всевышнему Владыце им и нам вся, яже к животу и благочестию, полезная и благопотребная: болящия исцели, малодушныя ободри, скорбящия утеши, обидимыя заступи, немощныя подкрепи и поверженныя долу возстави, всем вся, благодатию тебе от Бога данною, даруй по коегождо нужде и потребе, во спасение души и во здравие телу.

Вознеси, угодниче Божий, всемогущую молитву твою, да будет в стране нашей выну мир и тишина, благочестие и благоденствие, в судах правда и милость, в советех мудрость и благое преспеяние, да утверждается же во благих человецех верность, в злых же страх и боязнь, во еже престати им от зла и творити добрая, да

такo в стране нашей Царство Христово растет и множится и да прославится в нем Бог, дивный во Святых Своих: Ему же единому подобает всякая слава, честь и поклонение Отцу, и Сыну, и Святому Духу, ныне и присно, и во веки веков. Аминь.



**ПОЛНЬІЙ
АКАФИСТНИК
КАНОНИЧЕСКІЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

НОВОЕ
НЕБО